

## **Dithero tsa Tirelano mo Kutlwanong**

15/2015 Thero ka Sontaga o o bidiwang Infokavite, e le ka 22. 02. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go 1 Joh. 3:8b, le re: "Se Morwa Modimo o se bonatshegetseng ke go senya ditiro tsa ga Diabolo."

1.Sefela sa 246 - 227/235

**2. Thapelo:** Modimo, Rara wa rona yo o mo legodimong, o re sedimose tse ka Mowa wa gago gore re tloganyane lefoko la gago, re dumele Mopholosi wa rona yo e leng Jesu Keresete. Re a leboga, ka o mo rometse mo go rona gore a senye ditiro tsa ga Satane. O re abele thata ya Mowa o o Boitshepo wa gago gore le rona re tlogame mo ntweng e re leng mo go yona, le rona re fenye ka thata ya ga Jesu Keresete, Mogolodi wa rona. Re kopa jalo mo leineng la gagwe. Amen.

3.Lefoko la Testamente e kgologolo le kwadilwe mo go Gen. 3:1-11;

Epistolo ka fa thulaganyong ya 2 e kwadilwe mo go Bahebere 4:14-16;

Efangele ka fa thulaganyong ya 5 e kwadilwe mo go Luka 22:31-43.

4. A go ipolelwe tumelo ya bokeresete!

5. Sefela sa 264 - 284/290

6.Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 4:1-11, e re: "Ya baa gona Jesu a gogelwang ke Mowa kwa sekakeng gore a raelwe ke Diabolo. E rile a sena go itima dijo malatsi a le 40 le masigo a le 40, a tshwarwa ke tlala. Jaanong moraedi a tla, a mo raya a re: 'Fa o le Morwa Modimo, bua gore majwe a, a fetoge dinkgwe.' Ene a fetola a re: 'Go kwadilwe ga twe: 'Motho ga a nke a tshela ka senkgwe fela; o tshela ka lefoko lengwe le lengwe le le tswang mo molomong wa Modimo.'" Jaanong Diabolo a mo isa kwa motseng o o boitshepo, a mmaya mo setlhoeng sa Tempele, a mo raya a re: 'Fa o le Morwa Modimo, itatlhele kwa tlase; gonne go

kwadilwe ga twe: 'O tla laela baengele ba gagwe ka ga gago; ba tla go kuka ka diatla, e se re gongwe dinao tsa gago tsa kgopiwa ke lentswe.'" Jesu a mo fetola a re: 'E bile go kwadilwe ga twe: 'O se ka wa leka Morena, Modimo wa gago!" Gape, Diabolo a mo isa kwa thabeng e e goletseng kwa godimo thata, a mmontsha magosi otlhe a lefatshe le bontle jwa ona, a mo raya a re: 'Tsotlhe tse ke tla di go naya, fa o ka wela fa fatshe, wa nkobamela.' Jesu a mo fetola a re: 'Ntlogela, Satane! Gonne go kwadilwe ga twe: 'O tshwanetse go obamela Morena, Modimo wa gago le go direla ene a le esi fela.'" Ke fa Diabolo a mo tlogela; mme baengele ba tla, ba mo direla." Amen.

**8. Thero:** Barategi mo Moreneng wa rona Jesu Keresete, re na le sefela se se kwadilweng ke Martin Luther ka ngwaga wa 1528. A ganetsanya thata le ba ga Zwingli ka dinyaga tsele ba ba neng ba fetola lefoko la Morena mabapi le selalelo se se boitshepo mo go maswe. Luther o ne a re ka sefela seo: "Lefoko le legolo la tlhomamiso ya selalelo a ba se ka ba le ama! 'Modimo o mo ntlheng ya rona mmogo le Mowa le dineo tsa ona.'" (Ka Setswana ba beile mafoko ao ka gore "ke ya go tsena mo tirong go ikgogela batho; ke ba fa Mowa dipelong, ke ba gogela mo nneteng gore ba nkitse sentle." Kopelo 183-169/-:9.) Ba ne ba re: Jesu Keresete ga a re abele nama ya gagwe, ga a re abele madi a gagwe mo selalelong sa gagwe se se boitshepo, mme Luther a ruta ka fa Lefokong la Modimo, a re: "Selalelo se se boitshepo ke mmele ruri wa ga Jesu Keresete, Morena wa rona, le madi ruri a gagwe. Se tlhomamisitswe ke Keresete ka esi gore rona bakeresete re je mmele wa gagwe mo senkgweng, re nwe madi a gagwe mo weineng." Ga re letlelelwe go fetola mafoko a Modimo gore a tsamaelane le tlhaloganyo ya rona e e senyegileng ka boleo. Ka sefela sele Luther o a re opedisa, go fitlhela mo letsatsing la kajeno, le ka Sezulu (le ka Setswana) sefela sa gagwe se se reng: "Modimo ke phemelo e re tshabelang go yona ..." 246-227/235. Ga re ka ke re fetola mafoko a Modimo gore a tsamaelane le tse tlhaloganyo ya rona e e sentsweng ka boleo e dumalanang le tsona, le e seng go latela ditimetso le dithaelo tsa ga Satane. Kana Satane e ntse e le Diabolo, o sa ntse a dira, o sa ntse a le teng, o sa ntse a re raela, o sa ntse a goga batho ka dithaelo tsa gagwe.

Ka kolobetso re tsetswe sešwa go nna bana ba Modimo. Go rewang ka go rialo, go rewa: Rara wa me yo o mo legodimong o a nthata, o a mpoloka, o a mphemela; le gore Nkgonne, e bong Jesu Keresete o mpholositse, a nkgolola, a nthekolola mo maleong otlhe, le mo losong la mo thateng ya ga Satane ka madi a a boitshepo a gagwe. Ke wa gagwe tota.

Satane ga a rate tseo, ga a rate boammaaruri. Ga a rate gore re boife Modimo, re o rate bogolo go tsotlhe, re ikanye ona o le osi fela. Satane o rata gore re gogwe ka diphatsiphatsi, ka tse di lebegang mo matlhong, ka tse di bosula mo matlhong a Modimo, ka dithaelo tsa ga Satane. Ke ka ntlha ya moo, fa Satane a re raela ka dithaelo tse dintsi. Ga a rate gore re theye botshelo jwa rona mo motheong wa ditsholofetso tsa Modimo

Re bana ba Modimo, gonne o re tsetse sešwa ka metsi le ka Mowa o o Boitshepo. Re bana ba Modimo ka kolobetso. Boammaaruri jo bo tshwenya Satane. Ga a rate gore re gogwe ke jona. O rata thata go jwala pelaelo mo dipelong tsa rona ka go re botsa gore: "Fa o le ngwana wa Modimo, o bolawa ke tlala ka ntlha ya eng? Fa o le ngwana wa Modimo, o lwala ka ntlha ya eng? Ke ka ntlha ya eng, fa o tlaletswe mo go kalo? O morwadie wa Modimo, mme o humanegile. Go tshusang go nna ngwana wa Modimo? Satane ke motlhalefi yo mogolo o dirisa botlhale jwa gagwe ka dipotso tse dintsi. O rata thata go di oketsa le mo dipelong le mo ditlhogong tsa rona. Gape ga a sisimoge go dirisa Dikwalo tse di boitshepo gore a re raele ka boferefere le botswerere jwa gagwe. O ne a sa sisimoga, le e seng go boborana go raela Jesu, le go dirisa Dikwalo tse di boitshepo go supa boferefere le botswerere jwa gagwe. Ga a nke a boifa, le e seng go sisimoga, le e seng go boborana go leka go re raela go re tshwara mo makoeng a rona.

Jesu o mo fentse ka go dirisa Lefoko la Modimo ka fa boikaelelong jwa lona. Mo thaelong ka ntlha ya tlala Jesu o arabile Satane ka lefoko le le reng: "Motho ga a nke a tshela ka senkgwe fela; o tshela ka lefoko lengwe le lengwe le le tswang mo molomong wa Modimo." Fa go buiwa ka ga "lefoko lengwe le lengwe," re a bolelelwa gore ga re letlelelwe go ikgethela lefoko lengwe fela go ikagela tumelo ya rona ka dikakanyo tsa rona mo go lona, mme re tshwanetse go tlhokomela Beibele yotlhe gore go kopanngwe

tsotlhe sentle, re se latele metlhala e re ka latelang ka tlhaloganyo ya rona ka go gopola gore e supiwa ka lona lefoko leo gore re se ka ra timela, bogolo fa mafoko a mangwe a Beibele a re thibela gore re se latele motlhala oo. Ka sekao: Re na le kgololesego ya bana ba Modimo. Mme re thibelwa ka molao go dirisa kgololesego eo ka go tlola ditaolo tsa Modimo. Ke gore ga re na go dirisa lefoko la kgololesego ka go timela ka nosi, le e seng go timetsa ba bangwe ka go dira boaka, gongwe ka go utswa, gongwe ka go nyatsa thero le disakaramente. Jesu a re: "A re se ka ra leka Modimo wa rona!" O se ka wa tshameka ka Modimo, ka go gopola gore Modimo o tshwanetse go go boloka, fa o ineela go tlola ditaolo tsa ona, gongwe o itatlhela fa fatshe, o sena go palama setlhare se se godimo. Fologa mo go sona, jaaka o ne o palama mo go sona gore o se leke Modimo gore a go tshware gore o se utlwe botlhoko ka go itatlhela fa fatshe fela. O se tshameke ka Modimo ka go gopola gore o tshwanetse go go busetsa mo tseleng ya nnete, fa o sena go ineela go ineela mo maakeng a ditimetso tsa dikereke tse dingwe, gongwe fa o ineetse go direla medimo e mengwe, o se gopole, fa Modimo o tshwanetse go go busetsa mo boammaaruring jwa tumelo ya nnete. Ga go tshamekiwe ka boammaaruri jwa thuto ya nnete, le e seng go le gonnye fela. Lefoko la Modimo le re: "O tshwanetse go obamela Morena, Modimo wa gago le go direla ene a le esi fela." Ke taolo ya ntlha le e kgolo e e reng: "O se nne le medimo e mengwe kwa ntle ga me!" Barategi mo Moreneng, Modimo ga o re goge ka ditsebe, gongwe ka dinko tsa rona, mme o re thibela ka lefoko la ona gore re se timele, re se latlhege.

Motlhodi, Mmoloki, Morekolodi, Mopholosi wa rona o re abetse Mowa wa gagwe gore a re direle ka dineo tsa gagwe. Re tlhoka lefoko la Modisa yo o molemo wa rona ka metlha mo ditseleng tsotlhe tsa rona gore re tlhomamisediwe mo tumelo ya nnete, re se ka ra timediwa ke Satane. Re tshwanetse go direlwa ke Modimo mo tirelong ya ona gore re nonofiswe go tlabana tlabano e e boitshepo, re direlwe ke ona ka selalelo se se boitshepo sa gagwe gore re emalalane le Satane le mephato ya gagwe. Re tshwanetse go itshwarelwa maleo a rona mo tirelong ya boipobolo gore re gopodiwe ka metlha ka lorato lwa ga Rara wa rona yo o re amogelang, rona ba re leng bana ba gagwe. Mowa o o Boitshepo o re direla thata gore o re tlhomamisetse mo tumelong ya

nnete, re kgone go fenya mo dithaelong tsa ga Satane, re nnele ruri mo phenyong, gore re se wele mo maleong, gongwe go fenngwa ke Satane.

Jesu Keresete o mo fentse. Re utlwile gore ene o ne a raelwa jang, le go fenya Satane. Gape re utlwile ka Epistolo ya kajeno gore "Moperesiti yo mogolo wa rona ga se yo o palelwang ke go utlwela makoa a rona botlhoko, mme re na le yo o neng a raelwa mo dilong tsotlhe fela jaaka rona, mme a se ka a leofa." O fentse Satane, a fenya loso, a fenya le bolele gore a re abele kabelo ya phenyo ya gagwe. Re ba gagwe gore le rona re fenye. A Mowa o o Boitshepo o re thuse gore le rona re nonofiswe go lwa ntwale e e boitshepo, re fenye mmogo le ona. Lefoko la thero le re ruta sentle ka ga phenyo ya ga Jesu Keresete yo o kgameditseng Satane a mo raya, a re: "Ntlogela, Satane!" "Ke fa Diabolo a mo tlogela." Satane ga a na thata mo go ene, gonne o fentswe. Le mo go rona ba re leng bana ba Modimo ga a na thata, gonne Nkgonne wa rona Jesu Keresete o mo fentse.

Ke "fa baengele ba tla, ba mo direla." Barategi mo Moreneng Efangele ya kajeno e khutla ka polelo e ntle. Ka nako nngwe, ke re go tla diragala, fa re tla ntshiwa mo lefatsheng leno la ditlalelo, re tsene mo pusong ya kgalalelo ya Modimo, ke fa baengele ba tla re direla go re isa gae, jaaka ba dirile ka Lasaro yole. Ke fa re tla busa mmogo le Jesu Keresete mo pusong ya gagwe go ya bosakhutleng.

Ke gona jaanong re sa ntse re le mono mo sekakeng, re a raelwa, re sa ntse re bogisiwa. Rona ba re leng bana ba Modimo ka kolobetso ya rona ga re ise re ntshiwe mo lefatsheng ka yona gore re tshele mo marung, gongwe mo legodimong, re sa ntse re le mo lefatsheng, re a raelwa, re a bogisiwa, re tlabana tlabano e e boitshepo. A re se ka ra lebala gore Jesu Keresete o fentse Satane, o sentse ditiro tsa gagwe, Satane ga a tlole a na le thata e kgolo mo go rona ba re leng bana ba Modimo. A re ithuteng sešwa go iphemela ka lefoko la phenyo la ga Keresete, le le reng: "Re tlogele, Satane!" fa re raelwa ka dithaelo tsa gagwe.

Go na le tse di gaisang dinkgwe, ke re: Tse di fetang dijo le dino, ke lefoko la Modimo. Go na le se segolo thata go gaisa madi, dikhumo le boipuso, le kgalalelo ya lefatše, ke go dirafatsa thato ya Modimo. Mo bofelong Modimo o rata go re tsenya mo pusong ya

ona ya kgalalelo gore re buse mo go yona. Barategi mo Moreneng, a re se ka ra lapa mo tumelong. Kana Morena o gaufi, o mo tseleng ya go tla go athola baswi le ba ba sa ntse ba tshela.

A re opeleng mmogo le Martin Luther kajeno yo o buileng, a re: Lefoko le legolo, ga ba ka ke ba le ama, le le reng: Modimo o mo go rona mmogo le Mowa le dikabelo tsa ona, le ditemana tsa sefela tse di reng: "Le fa fatsheng go tletse jang bo-Satan mo ntlheng tsotlhe, re ka bo re ba boifelang? Re tla ba fenya gotlhe. Satan yo ` fentsweng, yo ` sekisitsweng, a ka senya jang? Ke yo o ka digwang ka `Foko le le lengwe. Lefoko le tlhomama jang, ga le na go fetolwa! Ke Jesu yo ` le emelang ka ona Mowa wa `gwe, Ba ` re amogang tse re di tshotseng, di tla ba thusang? Ka e se ba ` kgonang go re amoga puso!" (246 - 227/235:3-4) Bagaetsho, puso ke ya rona, a re se ka ra belaela, mme re itshwarelele mo tsholofetsong ya Modimo, go ya mo losong. A Mowa o o Boitshepo o re thuse mo go tseo! Amen.

**9. Thapelo:** Modimo, Rara wa rona yo o mo legodimong, re lebogela lefoko la gago. Tiisa tumelo mo go rona gore re se felelwe ke thata mo tseleng, re ntse re tsamaya mono mo sekakeng, re bolawa ke tlala, re tshwenyegile. Re lebogela bopelotlhomogi jo bogolo jwa gago jo bo sa ntseng bo re tlhomamisetsa mo tsholofelong, fa o tla re abela phenyo mmogo le Keresete. Re kopa jalo mo leineng le le boitshepo la gagwe, la ga Morwao, Morena, Mopholosi wa rona Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 307 - 283/289

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke P. C. Weber, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.